

Folo yana leta anavelu TIMOTI againe

Hida Timoti yana leta anavelu Folo Loma deliya gimiyami tu gi'etoladina. Yesu ana laumamala fa'ina deliya hise-havagilena, ada Folo ana luve'alika ana tova gilurveda'ufo ma gi'ayaunena tovai-nadi gi'etoladi.

Bana Timoti Folo ana toveluga higa Efeso tovetumagana adi yo'o gi'itave'avidu, kadu vaita Folo natuna amine Yesu yana yo'ogaga agaidiya. Hida leta againe Folo yana nuwanuwa lakahina Timoti againe giyakahina, kadu gigahevagadonena be ve'umagigi agaidiya gina'atuvefa'ila ada vehawala tunutunugina againe ginaluve'avina. Leta dobona hidede amine.

Timoti ana lusiule. 1:1-2

Folo Timoti yana vetumagana fa'ina givesiule.
1:3-7

Timoti yana wa'idibumuhiga yana
wa'atuvefa'ila ana vehimeya
gida'itave'avina. 1:8-2:13

Keliso yana tofaisewa ana iya'iyaya fa'ina. 2:14-
26

Tova ana lauyabu againe kaliva hinakoyo-mo'a.
3:1-9

Timoti ana vehimeya fa'ina Folo yana kivetuve-
tunu kadu yana ago'abi ma. 3:10-4:5

Folo tauna ana ayauna yana nuwanuwa ma.
4:6-18

Lukafoi tulina tulina. 4:19-22

1-2 Yo siule natunuwaku Timoti. Iya Folo Yesu Keliso yana afositolo ya leta ga'etoladina be una'itana. Bana Yaubada givegideku be Yesu Keliso yana kabu ganavaina, higa yana afositolo adi maka giveleku. Boi tuwaina giwonadabadaba vaita kaliva gaveyao Yesu Keliso buye hive'atutamo'aidi, medema yawai-vagahidi hinuhagana, ada mena yana wonadabadaba fa'ina gi'iveniniseku be galulumamalena. Yaubada Tamada kadu Yesu Keliso yada Kaiwabu hinanuwadoge hinahinekalikaliye kadu ase'ase hinakiveniwalovina.

Folo Timoti yana vetumagana toyogina ginuwenuwena.

³ Keke gavana fa'ina tu Yaubada againe gavesivesiule. Bana'e againe badi bwanenekweyao hihawahegedi amine, meda iya gahawahegeku be Bana fa'ine nuwafouku yegayegana gafififaisewa-yo keke tamo gavadi koyona fa'ina gadamatauseni-yo gadavenuwanauna. E, Bana againe gavesivesiule tu tova moya'aina bogi be uyadayada o fa'iniya gave'ove'o'ola. ⁴ Boi ganuyabuyabu tu utagi ma ganuwa-nunauyena ada nuwanuwaku lakahina gana'ita-havagile be higa Iya ganavemwamwalamo'a. ⁵ Ya vetumagana toyogina Keliso againe ganuwa-nunauyena, anafaiweya nagona o hina Yunisi be tubu Loisi Keliso ana vetumagana againe hihawahege-vagahidi tu tova adamoya iya ganuwave'avina vaita kadu o Keliso ana vetumagana againe uhawahege-vagahi. ⁶ Ada medemi Keliso uvetumagane-mo'ena fa'ina,

nuwa gatalafolena be faiwala Yaubada yana faisewa fa'ina givele-ma una'atu'auhina be keke ginakwe'u, au a vehimeya givele amanadi againe unafaiwala-mo'a. Boi nimaku againiya gaseni-yo gave'o'ole tovai-nadi Yaubada mena a vehimeya givele be yana faiwala unuhagana. ⁷ Au unafaiwala-mo'a, fa'ina Alu'aluwa Mahalina Yaubada giveda-ma guwana keke matauta. Au Bana gifaiwalaveleda be ka'ase'asevatu, tobohiyadeyao fa'idiya kahawahawahegeda, taudeyao yada nuwanuwa kahawahawatana.

Lau'age higa keke ginawowomumu au vehawala velema'ena againe ginaluve'avina.

⁸ Tu Bana gifaiwalavele fa'ina yada Kaiwabu ana hawavemogatala yo'o matadiya fa'ina keke unawowomumu. Kaiwabu ana laumamala fa'ina deliya hiseku tu iya yana kaliva yogoyogoniku fa'ikuya keke unawowomumu. Au tauni unahawahege be yada Kaiwabu yana Venuwa'ata Yamumuna unalumamalena againe, iya amine meda o buye vita tulina tulina unawahidi. E, Yaubada ginafaiwalavele amine vitai-dina unawahidi. ⁹ Bana Yaubada gikibababaleda ada gikovada be yada dewa matatabuna mahamahalina Bana matane kanamiyami. Ada kibababala inubana ma keke ide yada dewa haghagina, au Bana Tauna yana nuwanuwa kadu Tauna yana nuwadoga fa'ina gikibababaleda. Tuwai-lokalokana tova aimo keke gidave'inuba tu mena yana nuwadoga Yesu Keliso againe givele-vagahida. ¹⁰ Atu tova adamoya ada

1:7: Af 24:16 Af 16:1 Lo 8:15 **1:8:** Lo 1:16 **1:9:** Ef 2:8-9, Ta 3:4-5

Tokibababala Yesu Keliso yana hobu'ela againe mena Yaubada yana nuwadoga kabu'avane giyemu. Bana Yesu Keliso alika yana faiwala giyawelina, giyaweli-'owona ada kibababala ana Venuwa'ata Yamumuna againe yawai-vagahida ana eda gihawavemogatalena be kanamiyamiya-vagata. ¹¹ Ada au Yaubada givegideku be mena Venuwa'ata Yamumuna ganalulumamalena kadu ganavehawahala Keliso loseyanina amine yaku gahe wa'inubana. ¹² Tova moya'aina Venuwa'ata Yamumuna ana hawavemogatala againe gafiffaisewa fa'ina, mena vita tulina tulina gawahiwahina. Tu yaku aulolo yaku tagiya fa'ina keke-mo'a gadawowomumu, fa'ina Bana'e gavetumaganena-ma gahalamane-hagihagiyena, ada ganuwave'avina vaita aku vehimeya giveleku-ma Bana anafaiweya ginayavayavana be hidede amine ginanunauwena Kaiwabu yana yewa'ela ana toveya.

¹³ Au gavadi gavadi vehawala tunutunugina iya agaikuya unogalina, medema againe unaluluve'avina. Medema abaluvefota o fa'iniya. Ada ya wavetumagana ya wanuwakabubu Yesu Keliso againe give'inuba amanadi mena vehawala tunutunugina againe unaluluve'avina.

¹⁴ Yaubada yana nuwanuwa tunutunugina ana vehawala mena a vehimeya givele. Alu'aluwa Mahalina ase'asedeya gimimiyami-ma yana faiwala againe a vehimeya hagihagina una'itave'avina.

Tonuwayewa adi'iselu kadu toveluga sa'eyana

fa'idiya.

¹⁵ Tu o uhalamanena tovetumagana moya'aidi Esiya ana fafali againe hikiloweku, badi Fidelo kadu Hemodenisi buye'i. ¹⁶ Tu bana Onesifolo tova moya'aina ase'aseku gikikivevatuna ada iya deliya gamimiyami nonogana keke iya fa'ikuya gidawowomumu fa'ina, bana ana unuma agaidiya Kaiwabu yana hinekalikali gidaveta-laiyena. ¹⁷ E, bana keke iya fa'ikuya gidawowomumu. Au Loma againe gilakayemu ana toveya yana wadibumuhiga gileleleku gileleleku tu ginuhagaku. ¹⁸ Medema fa'ina Kaiwabu gave'o'olena be aimo ginayewa'ela kaliva ginavedewayaugida ana toveya, bana Onesifolo Kaiwabu yana hinekalikali ginanuhagana. Ada o'eni ahe uhalamanehagihagiyena yana veluga moya'aina agaikuya boi Efeso againe gamiyami ana toveya.

2

Timoti vita tulina tulina agaidiya gina'atuvefa'ila.

¹ Siule natuku, yada faiwala inubana Yesu Keliso. Bana gifaiwalavele fa'ina tova moya'aina unafifaiwala. ² Yaku laumamala kaliva moya'aidi matadiya o unogalina. Nuwanuwaku kaliva dibudibumuhigidiyao unavenuwadanedu tu bonaku unavehawaledi be higa hinana adifaiweya mali kaliva hinavehawaledi. ³ Wa'ita, ide tovetumagana vaita Yesu Keliso yana tolugaviya amine, ada au tova moya'aina vita tulina tulina kanunuhagana. O keke una'ota, au

mena vitai-dina agaidiya una'atuvefa'ila. ⁴ Hai tolugaviya nuwanuwana yana togiyomatana nuwana ginakiveyamumuna, medema keke mali nuwanuwa againe ginahawahegeni au laugaviya ana faisewagaga gina'itave'avina. ⁵ Meda anafaiweya hai tomadu ve'amadu againe ginamadu, medema ve'amadu ana vehimeya gina'itave'avina. Ka'i mali nuwanuwa amine ginamadu, keke tomaduhega ana badau kikaiwabuna ginavaini. ⁶ Kadu hai tofaha ve'ihifahifa againe gina'idibumuhiga, gilubodana be medema yana faha guwana ginamidi'ana. ⁷ Mena abaluvefota tohiye yada Kaiwabu yana faisewa fa'ina gayakahina-ma unanuwenuwena ada Bana yana kivetuvetunu againe ana nuwanuwa unahalamanena.

⁸ Tu Yesu Keliso unanuwa-nunauyena. Bana'e tokaiwabu Devida ana yo'o agaidiya gitubuyemu ada gi'alika tu gimididi-havagi. Venuwa'ata Yamumuna Bana fa'ine meda iya galumamalena.

⁹ Mena Venuwa'ata Yamumuna fa'ina vita ganuhagana, ada iya vaita tokoyona lakahina amine bulava kainumula againe hiyogoku. Iya hiyogoku tu keke adifaiweya Yaubada bonana hinayogoni. ¹⁰ Hidema fa'ina vita moya'aina ga'atuvefa'iledi be higa badi kaliva vevine Yaubada giluwafadi-ma adi kibababala hinanuhagana ide buye'i, ada Yaubada buye kanakaiwabu-vagata. Mena kibababalai-nadi Yesu Keliso againe give'inuba. ¹¹ Hida gahe au gahe velemo'ena,

Ka'i ide Keliso buye ka'alika,
kadu aimo Bana buye kanamiyamiya-vagata.

¹² Ka'i vita agaidiya kana'atuvefa'ila,
kadu aimo Bana buye kanakaiwabu.
Ka'i Bana kanavekekeyena,
kadu aimo Bana ide ginavekekeyeda.

¹³ Ka'i ide yada wonadabadaba kanayawelina
au Bana gavaimi gigahe medemi ginahuluva,
fa'ina Bana yana wonadabadaba
keke-mo'a anafaiweya ginayawelini.

Gava tofaisewa yamumuna Yaubada matane?

¹⁴ Natuku, mena gaitomai-dina ahe galukahihiyena-ma fa'ina ya yo'o nuwadi unatalafolefolena. Kadu Yaubada matane unavenuwa'atadi be keke hifufu tulina tulina fa'ina hinavekwavekwageya. Mena yadi vekwageya againe keke tovanenega hinavelugadi, au yadi vetumagana hinakivekoyona. ¹⁵ O tauni ya faisewa againe una'idibumuhiga be higa aimo Yaubada matane unamidi ana toveya, keke unawowomumu. Au Bana ginahawaveyamumuye ginagayo, “Bana tofaisewa hagihagina. Yana wahalamana yaku gahe velemo'ena fa'ina givehawala tunutunugina.” ¹⁶ Tu gahe-kawokawowo keke Yaubada ana vetumagana gidalubodani-ma unavekwaulaugena. Badi gaveyao keke nuwanuwa velemo'ena tu gahe-kawokawowo againe hihawahegedi, medema Yaubada hivekwaulaugena ada yadi koyona gimoya'ai. ¹⁷ Wala ana koliya kaliva wowona matatabuna gidamana be gikivekoyona amine, meda badi

togahe-kawowo yadi vehawala ginadamana be moya'aidi ginakivekoyodi. Mena tovehawalai-dina adi'iselu adi egana Haimeniyo kadu Fileto. ¹⁸ Badi nuwanuwa velemo'ena ana eda hihegena. Higahegahe higayo, “Ide Yesu againe kavetumagana-ma vaita ahe kadamididi-havagi. Aimo kana'alika tu keke wowo-mo'eda ginamididi-havagi.” Mena yadi gahe hinogaliniyo tovetumagana tufoidi hinuwanuwaluga ada yadi vetumagana gilewalewa. ¹⁹ Tu'ena nuwanuwa velemo'ena vaita ogola o'olina amine Yaubada gisedonena-ma keke gidalewalewa. Au o'olina gimidi ada yana venuwa'ata hidede amine gi'etoladina,

Kaiwabu Tauna yana kaliva gihalamanedi.

Kadu gahe sa'eyana ma,

Hai kaliva gigahe vaita bana Kaiwabu yana kaliva,

medema dewa koyona anafaiweya gidavek-waulaugena.

Iya Yaubada nimaku.

²⁰ Tu abalufefota sa'eyana ganalukahihiyena. Wakalivana sa'eyana nau'a tulina tulina yana manuweya gidadauda. Nau'a tufona wafatana higa gola o siliva againe hibubuna. Tufona ai o maikawa againe hibubuna. Nau'a wafatana kikaiwabudiyao fa'idiya hisena tu nau'a-kawowo yogo ana abavedodoga fa'ina hisena. ²¹ Mena nau'a anafaiweya kaliva. Hai kaliva nuwanuwa koyona givekwaulaugena be ase'asena gikolana, medema nau'a wafatana kikaiwabudiyao fa'idiya hisena-ma amine. Au bana kalivai-nadi sevesevhailana, faisewa yamumuna tulina tulina fa'ina

kikidewadewana, ada Kaiwabu yana faisewa fa'ina bana ginaluwafana.

Gava huluva Kaiwabu yana tofaisewa gilubodana.

²² Tu natuku, tubulakata yadi nuwanuwa ita'italuvadigana dewai-nadi una'osena. Tauni unahawahege be Yaubada yana nuwanuwa amine unahuluhuluva, ya wavetumagana ya wanuwakabubu ya wa'aseniwalova. Ka'i mena edai-nadi againe unanauna, au gaveyao moya'aidi wa'ase'asedi yegayegana Kaiwabu yana veluga fa'ina hive'ove'o'ola-ma o badi buye'li wananauna. ²³ Kaliva tufoidi gaitoma-kawowo fa'ina tova moya'aina hiveve'alakwalakwakwa. Medema dewa kwavakwavana kadu fanifanina ada againe vekwageya tulina tulina gilakayemu. Ve'alakwalakwakwa una'otayabuyabuna.

²⁴ Fa'ina vekwageya Kaiwabu yana tofaisewa keke gidalubodani. Au gilubodana be o Kaiwabu yana tofaisewa kaliva moya'aidi unahinekalikaliyedi, unavehavehawaledi mahamahalina kadu una'atuvefa'iledi. ²⁵⁻²⁶ Kadu badi hivekwageye kalivai-dina bona bikabikana againe unakivetuvetunudi. Badi nuwanuwa velemo'ena hikilowena-ma Setani yana dai againe givebe'udi-yo yana abavehimeya dibune himimiyami be yana nuwanuwa hi'idibumuhigena. Ka'i bona bikabikana againe unakivetuvetunudi, au Yaubada ka'i yadi nuwawilana ginaveledi be nuwanuwa velemo'ena nuwadi ginakifoleni-yo yadi

nuwafani ginahavaina, ada Setani yana dai againe hinahobu.

3

Tova ana abalauyabu againe kaliva hinakoyomo'a.

¹ Tu natuku, nuwanuwaku unahalamane-hagihagiyena tova ana abalauyabu againe vita moya'aina ginalakayemu. ² Gavadiyo tova vitana ginalakayemu? Kaliva taudiyaogaga hinanuwenuwedi, mani hina'ita'italuvadigena, taudiyao adi egana hinakikilakahina kadu hinaseselakalaka. Mali kaliva hinahawave'iyohoyohoyedi, hinadiyao tamadiyao bonadi keke hina'idibumuhigeni, mali kaliva yadi nuwakabubu fa'ina keke hinavesiuleyedi, kadu Yaubada keke ma'ita hinamatauseni. ³ Medema tovai-nadi keke tamo hinekalikali hinaseyemauneni, veyao hinakilowe-mo'ena, hinaveyaveyaina, keke ma'ita taudiyao hinahawatadi. Au badi kaliva luluvehawalidiyao ada dewa hagihagina keke ma'ita nuwadi ginavaini. ⁴ Kadu tobohiyadiyao nibaidiyao agaidiya hinahawavemogataledi, keke yadi wanuwanuwa tu hina'ihokohoko be tobohiyadiyao vita hinaveledi, ada nuwalaka adiga. Keke ma'ita Yaubada againe yadi nuwanuwa hinaseni, au taudiyao yadi vemwamwala againe hinanuwanuwa. ⁵ Kebuladiya hinatafatafalolo tu gava ase'asediya Yaubada yana faiwala keke ma'ita hina'ayauneni. Badi kalivai-dina keke unavetobohiyantedi,

au una'otayabuyabudi. ⁶⁻⁷ Badi kalivai-dina tufoidi mali kaliva yadi manuweya hilukuluku-yo vevine u'udi keke ma yadi bonayafayafa againe hinuwanuwa'abiyedi. Badi vevine-dina yadi koyona moya'aina vaita vainuwana amine hi'ayaunena, ada tova be tova nuwanuwa ita'italuvadigana agaidiya hihawahawahegedi. Kadu tova moya'aina vehawala tulina tulina hivenovenogalena tu keke-mo'a Yaubada yana nuwanuwa velemo'ena fa'ina halamana hidavivaini. ⁸ Tuwai-mo'ena kaliva adi'iselu adi egana Yanesi be Yamibelesi Idifita againe Mosese hivenibainena amine, meda badi galukahihiyedi-ma kalivai-dina Yaubada yana nuwanuwa velemo'ena hivenibainena. Au nuwadi gi'uyuyuna ada Yaubada ana vetumagana againe keke hidahawahegedi velemo'ena. ⁹ Atu yadi nuwanuwa againe keke adifaiweya hinafaiwala-mo'a, fa'ina aimo yadi nuwanuwa kwavakwavana ma kaliva moya'aidi hina'itana, boi tuwai-mo'ena Yanesi be Yamibelesi agaidiya gilakayemu amine.

Gahevagadona Timoti ana vehimeya fa'ina.

¹⁰ Siule natuku Timoti, iya keke badi amine o uhalamanena. Fa'ina yaku vehawala, yaku dewa, yaku inuba, yaku vetumagana, yaku atuvefa'ila, yaku nuwakabubu, yaku asevatu o u'ita-mo'ena. ¹¹ Kadu aku ve'umagigi kaliva nimadiya be yaku vedivediwe u'ita-hagihagiyena. Boi melala tohiye Anidiyoka Aikoniumi Lisidila agaidiya vita lakahina

lakahi-mo'ena Keliso fa'ine kaliva nimadiya ganuhagana-ma o uhalamane-hagihagiyena. Vita lakahi-mo'ena nonogana Kaiwabu vita matatabuna agaidiya gilugolegoleku. ¹² E, ganagahe. Gaveyao moya'aidi nuwanuwadi Yesu Keliso againe hinamiyave'avina be Yaubada yana nuwanuwa amine hinahuluhuluva, medema vita kaliva nimadiya hinanuhagana. ¹³ Atu badi kaliva koyodiyao kadu tove'alololo yadi koyona hinave'atutamo'aina be hinakoyo-mo'a. Taudiyao hinave'alololo kadu mali kaliva badi hinalololodi. ¹⁴ Tu o'eni ma gava nuwanuwa gava nuwanuwa velemo'ena agaidiya usikulu be uvetumagana toyogina, vehawalainadi againe unaluluve'avina. Ime yami tovehawala uhalamanema. ¹⁵ Kadu unanuwanunauyena higa aimo kabi'oniya uvebutu Yaubada bonana eto'etoladina ana halamana uvaivaina be ununauwena tova adamoya. Yaubada bonana againe halamana afaiweya uvaini-yo Yesu Keliso againe uvetumagana be a kibababala unuhagana. ¹⁶ Yaubada bonana eto'etoladina ana gahegahe matatabuna Yaubada Alu'aluwana giyuvetunetunena. Gahe-nadi yana faisewa hidede amine. Nuwanuwa velemo'ena givehavehawaleda, yada koyona fa'ina gilulu'ageyeda, hagavila fa'ina gikivetuvetunuda, nuwanuwa tunutunugina fa'ina nuwada gikikifolena. ¹⁷ Ada au hidede amine Yaubada ide yana kaliva gikidewedeweda be faisewa yamumuna tulina tulina adafaiweya

kana'itave'avina.

4

¹ Timoti, adamoya a vehimeya gavele Yaubada matane kadu Yesu Keliso matane, Bana'e wayawaideyao kadu ali'alikadiyao ginavedewayaugida. Bana ginayewa'ela be yana abavehimeya ginasena ma fa'ine ganagahevagadone. ² A vehimeya hidede amine. Yaubada bonana unalulumamalena. Ka'i tova gilubodana o ka'i keke gidalubodani, au ai'adi unalulumamalena. Kaliva unakivetuvetunudi, unadakedakeyedi kadu unalulu'ageyedi. Atuvefa'ila kadu vehawala againe unahawahege-vagahi. ³ Fa'ina tova gina'ela be againe kaliva vehawala tunutunugina hinakilowena. Au taudiyao yadi nuwanuwa hinamuliyena ada tovehawala fwayafwayadiyao tulidi tulidi hinalledi be gava vehawala gava vehawala tagadi ginalubodana, medema hinavenogalena. ⁴ Ada Yaubada yana nuwanuwa velemo'ena ana venogala hinakilowena be kaliva yadi nainaiya higa gahe-kawowo againe hinahawahegedi. ⁵ Tu o'eni ma tova moya'aina unamidi toyogina, vita tulina tulina agaidiya una'atuvefa'ila, Venuwa'ata Yamumuna unalulumamalena be higa kaliva Yesu Keliso againe hinahawahegedi, au a vehimeya ana faisewa tulina tulina una'itave'avidu.

Folo yana alika tova gilurveda'ufo ma gilukahi-hiyena.

⁶ Tu iya'eku ma yaku tova a giyemu be gana'alika. Totafalolo oine higa yadi abahawahega Yaubada matane hihiwana be gimadu amine, meda tova kabisona kaliva alikeya hinahegeku-yo dayagiku ginamadu ada hida babi ganahegena. ⁷ Iya Keliso yana tolugaviya yaku faisewa yamumuna againe ahe gafaiwala-mo'a. Tomadu yana ve'amadu giluyabuna amine, aku vehimeya matatabuna Kaiwabu giveleku-ma ahe galuyabuna. Keliso ana vetumagana againe ahe ga'idibumuhiga-mo'a. ⁸ Hidede amine ga'atuvefa'ila, ada yaku dewa tunutunugina Yaubada matane fa'ina aku badau kikaiwabuna higa aku laufata yamumuna gikidewedewena be gidadauda. Aimo tova mulina Kaiwabu Bana Tovedewayauga kaliva sa'eyana sa'eyana agaideya ginalaufata tunutunugina amanadi ginayewa'ela ana toveya, mena aku laufata ginaveleku. Ada keke iya'ekugaga, au kadu gaveyao moya'aidi Kaiwabu againe hihawahegedi be yana yewa'ela fa'ina hilulauboda, medema buye adi laufata yamumuna ginaveledi.

Folo tauna yana miyami fa'ina gilukahihi.

⁹⁻¹⁰ Timoti, nuwanuwaku unamadu'ela, fa'ina tobohiyakweyao moya'aidi hinuyabuyabuku. Dimasi hida babi ana nuwanuwa nuwana givaina fa'ina, gikiloweku be ahe gina Tesalonaika againe. Bana Kelesekeni Galesiya ana fafali againe gina, ada bana Taitasi gina Dalimesiya ana fafali againe. ¹¹⁻¹² Tikiko Efeso againe ga'iveninisena be

gina. Bana Luke anakaiibe iya buye amimiyami. Maki unavega'aulena be buye wana'ela, fa'ina bana yaku faiseweya anafaiweya ginavelugaku. ¹³ Boi Talowasi melala gahegena againe aku aikeva vewabana Kafo againe gase-vagahina. Una'ela ana toveya una'aliyena, kadu yaku buki adi loi tu nuwanuwaku lakahina yaku buki vewabana yomuyomu kwalifidi againe hibubuna-ma buki-dina.

¹⁴ Tu bana Aleksanida lokoloko kainumula ana to'aibubuna ma vita lakahina giveleku. Yana dewa fa'ina yada Kaiwabu ginalaufata. ¹⁵ Bana yada laumamala givenibainena toyogina fa'ina, o'eni kadu tauni una'itave'avi bana againe.

¹⁶ Aku vedewayauga himidivebutu againe keke tamo hakwadi gidalugolegoleku. Au tobohiyakweyao moya'aidi hinuyabuyabuku. Nuwanuwaku Yaubada mena yadi koyona ginavenuwauluyena. ¹⁷ Badi hinuyabuyabuku tu yada Kaiwabu lilikuya gimiya ada gifaiwalaveleku be yana Venuwa'ata Yamumuna ana nuwanuwa tulina tulina ga'awatalatalainena be badi keke miYuda tu yo'o tulidiyao kalivai-dina hinogalina. Ada au Kaiwabu vita lakahi-mo'ena againe gilugolegoleku. ¹⁸ Ada Kaiwabu vita matatabuna agaidiya ginalugolegoleku ada iya lulukukuwaku lobameya ginavega'auleku be yana itave'avina againe ganamiyamiya-vagata. Bana ana egana kanakilakahina ada yana kikaiwabu ginaduva-vagata tova inaga inaga keke ana abalauyabu. Ehe hidedemi.

Folo yana lukafoi.

¹⁹ Yaku nuwakabubu badi Filisila be Akwila agaidiya kadu Onesifolo ana unuma agaidiya. ²⁰ Bana Elasito Kolinita againe gimiyi ada Talafimo gi'aulolo fa'ina Mailito againe ga'elayabuyabuna. ²¹ Nuwanuwaku unagalualuva be aimo kwadudu ana tova keke ginavebutu tu una'ela. Yubulo, Fudenisi, Laino, Kelodiya kadu tovetumagana moya'aidi hilukafoiye. ²² Kafoi natuku, Kaiwabu ginave'alune, ada omi tovetumagana moya'aimi ginanuwadogemi.

(Iya Folo bonaku.)

**Yaubada Bonana Veyao Ivaguna Bona
Iduna
The New Testament in the Iduna Language of Papua
New Guinea
Nupela Testamen long tokples Iduna long Niugini**

copyright © 1983, 2003 Wycliffe Bible Translators, Inc.

Language: Iduna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

PDF generated using Haiola and XeLaTeX on 22 Feb 2024 from source files dated 31 Aug 2023

73458371-ad55-5c77-8b6b-5eca8d58f667